



Kelebihan Qiamullail

Daripada Hafsa R.Anha menceritakan kisah mimpi adiknya kepada Rasulullah SAW, lantas Baginda SAW bersabda:

نَعَمْ الْعَبْدُ عَبْدُ اللَّهِ لَوْ كَانَ يُصَلِّي مِنَ اللَّيْلِ

Maksudnya: “Sebaik-baik hamba adalah Abdullah, seandainya dia melakukan qiamullail (solat malam).”

Riwayat al-Bukhari (1122, 1157, 3738, 7029) dan Muslim (2479)

Pedoman dan Iktibar Hadis

Antaranya:

1. Solat merupakan tali hubungan antara hamba dengan Tuhanya kerana ibadat solat secara langsung berlaku interaksi antara kedua-duanya. Dengan sebab itu dikatakan “siapa yang mahu berbicara dengan tuhan hendaklah dia menunaikan solat dan siapa yang mahu Allah berbicara dengannya hendaklah dia membaca al-Quran kerana al-Quran adalah kalamullah.”
2. Adapun sebab datangnya hadis ini ialah seperti yang dinyatakan oleh Abdullah bin Umar R.Anhuma tentang dirinya, dia mengatakan: Di zaman Rasulullah SAW para sahabat bermimpi, maka tatkala Rasulullah SAW melaksanakan solat subuh, baginda Nabi SAW melihat ke arah kami dan berkata: Adakah di antara kalian bermimpi? Pada waktu saya tidur di masjid. Ibn Umar mengatakan: Saya bermimpi di dalam tidur, seolah-olah ada dua orang lelaki, yang satu mengambil tangan kanan saya dan satu lagi mengambil tangan kiri saya, lalu mereka berdua membawa saya. Di sana saya melihat sebuah perigi yang dibina daripada batu dan di dalamnya terdapat orang-orang yang sedang

diseksa. Mereka berkata: Jangan takut! Lalu mereka memegang tanganku dan membawaku kembali.

3. Kemudian mereka memberi saya secarik pakaian mewah dan indah yang diperbuat daripada sutera pada tanganku. Setiap kali saya menunjuk sebuah tempat dengan tangan ini, dia terbang bersama saya menuju menuju *raudhah* (telaga) yang hijau.
4. Pada pagi hari, selepas melaksanakan solat Subuh, Ibn Umar R.Anhuma hendak menceritakan mimpiannya itu kepada Rasulullah SAW akan tetapi dia merasa malu, kerana dia masih kecil. Maka dia menceritakan mimpiannya kepada saudara perempuannya, iaitu Hafsa, isteri Rasulullah SAW supaya Hafsa menceritakannya kepada Rasulullah SAW. Lalu Hafsa menceritakannya kepada Rasulullah SAW. Rasulullah SAW tersenyum dan bersabda:


نِعْمَ الْعَبْدُ عَبْدُ اللَّهِ لَوْ كَانَ يُصَلِّي مِنَ اللَّيلِ

Maksudnya: “Sebaik-baik hamba adalah Abdullah, seandainya dia melakukan qiamullail (solat malam).”

5. Setelah peristiwa itu, Abdullah bin Umar R.Anhuma sentiasa melakukan qiamullail.
6. Qiamullail ialah solat malam yang dinamakan *Tahajjud* jika dilakukan selepas tidur. Ini kerana perkataan *Tahajjud* bererti meninggalkan tidur.
7. Qiamullail ialah solat sunat yang tidak ditentukan bilangan rakaatnya dan dilakukan selepas terjaga daripada tidur sebelum azan Subuh.

Mutiara Hikmah

- ❖ **Abu Sulaiman al-Darani** berkata: Ahli qiamullail dalam malam mereka lebih lazat daripada ahli *lagha* dalam kelalaian mereka dan kalaulah tidak kerana malam nescaya aku tidak suka untuk kekal di dunia ini.
- ❖ **Maha Suci Allah** yang menjadikan kepasrahan kepada-Nya sebagai kekuatan, yang menjadikan rasa perlu kepada-Nya sebagai kekayaan, yang menjadikan permohonan kepada-Nya sebagai kemuliaan, yang



menjadikan rasa rendah diri kepada-Nya sebagai ketinggian dan tawakal kepada-Nya sebagai kecukupan.

Kisah Teladan



Seorang ulama yang ahli ibadah dan zuhud yang bernama Tawus bin Kaisan berkata: Pada suatu malam saya berada di Baitul Haram (Kaabah), kemudian saya melihat kedatangan Ali Zainal Abidin bin Husain.

Maka aku berkata di dalam hati: “Ini adalah seorang lelaki soleh dari keturunan Nabi SAW, sebaiknya saya mendengar doanya pada malam ini.”

Kemudian Tawus melanjutkan ceritanya: Ali Zainal Abidin kemudian solat dan sujud. Saya berusaha dengan bersungguh-sungguh agar dapat mendengar apa yang dibacanya, maka saya mendengar bahawa beliau berkata: “Hamba-Mu dengan kebinasaan (yang engkau berikan), orang yang miskin kepada-Mu dengan kebinasaan (yang engkau berikan), orang yang fakir kepada-Mu dengan kebinasaan (yang engkau berikan) dan orang yang meminta kepada-Mu dengan kebinasaan (yang engkau berikan).”

Tawus berkata lagi: Kemudian saya menghafal doa tersebut. Tidak ada satu malapetakapun yang sedang aku hadapi kemudian aku berdoa dengan doa tersebut kecuali Allah memberikan jalan keluar kepadaku.”

Dan rahsia doa ini adalah pengagungan terhadap Tuhan Yang Maha Suci dan penghinaan seorang hamba kepada dirinya sendiri serta keikhlasan dalam memohon pertolongan kepada Tuhan dan kesungguhan mencintai keutamaan Allah.

Sesungguhnya doa adalah termasuk bukti mengagungkan Allah SWT, kerana di dalam berdoa semuanya sama di hadapan Allah. Sama ada orang yang berdoa itu adalah orang kaya, fakir, lemah, kuat, seorang hamba abdi atau majikan. Dalam doa terkandung makna bahawa hati kita menghormati kekayaan Allah, mengakui terhadap segala kesempurnaan Allah dan keagungan-Nya serta keyakinan bahawa diri manusia adalah fakir, lemah dan hina di sisi Allah SWT.

